

Rinforzar la stabilitad en il sectur da finanzas

Il pli important en furma concisa

L'ultima crisa finanziala ed economica globala ha mussà er en Svizra ch'ina banca gronda che ha problems po esser ina chargia considerabla per l'economia publica. Il Cussegl federal vul impedir che talas bancas sajan «memia grondas per far naufragi» (too big to fail, TBTF) e ch'il stadi stoppia impunder daners da taglia per las salvar. Perquai è vegnida revealada la Lescha da bancas (en vigor dapi il 1. da mars 2012) e cumpllettada cun disposiziuns specificas davart la regulaziun da bancas relevantas per il sistem. Il pachet da mesiras prevesa quatter mesiras essenzialas per rinforzar la stabilitad en il sectur da finanzas: rinforzament dals agens meds (fin la fin da l'onn 2018), pretensiuns pli rigurasas envers la liquiditat, meglia diversificaziun da las ristgas e mesiras organizatoricas. La gronda part da las disposiziuns correspondentes davart la realisaziun è en vigor dapi il schaner 2013 ed è sa cumprovada. Pervia dal svilup internazional è per part anc avant maun in basegn d'agir per minimar anc vinavant las ristgas da bancas grondas. Quai pertutga cunzunt las pretensiuns envers il capital.

Reducir las ristgas sistemicas cun regulaziuns pli severas per bancas ch'en impurtantas per il sistem

Il pachet da mesiras «too big to fail» duai meglierar la resistenza da las bancas relevantas per il sistem cunter crisas sco er rinforzar la stabilitad da l'entir sectur da finanzas. En il center stattan quatter mesiras essenzialas.

- **Rinforzar ils agens meds finanzials:** Las bancas TBTF ston tegnair agen chapital da meglira qualitad ed accumular fin la fin da l'onn 2018 fin a 19 pertschient agen chapital graduà tenor las ristgas (tut tenor la summa da bilantscha e da la tendenza da ristga). 10 pertschient ston esser agen chapital «dir». Da nov dastga quel mo cumpigliar chapital da basa e gudogns retegnids, damai ch'ina banca po disponer mo da tal da tut temp. Ils 9 pertschient restants pon vegnir accumulads tras «contingent convertible bonds» (CoCos). CoCos valian sco chapital ester e vegnan transfurmads en aczias u en certificats da participaziun, sche la quota d'agen chapital supassa ina tscherta valur. Els mettan uschia a disposiziun automaticamain agen chapital. Ultra da quai na dastgan ils agens meds betg supassar 4,56 pertschient da la summa totala da bilantscha (leverage ratio).
- **Meglierar la liquiditat:** Las bancas relevantas per il sistem ston ademplir pretensiuns pli severas areguard la liquiditat, areguard scenaris da stress ed areguard la rapportaziun.
- **Diversifitgar las ristgas:** Ils entretschaments entaifer il sectur da las bancas ston vegnir reducids.
- **Mesiras organizatoricas:** Las bancas TBTF ston esser organisadas uschia, che las funcziuns relevantas per il sistem, sco per exemplu ils pajaments, èn garantidas per l'economia publica er, sch'i smanatscha ina insolvenza (plan en cas d'urgenza).



Schweizerische Eidgenossenschaft
Confédération suisse
Confederazione Svizzera
Confederaziun svizra

Departament federal da finanzas DFF

Las disposiziuns correspondentes areguard la realisaziun èn cuntegnidas en la revisiun da l'Ordinaziun davart ils agens medis ch'è entrada en vigur il 1. da schaner 2013. Questa ordinaziun transferescha er la realisaziun da las novas reglas internaziunalas dal Comité da Basilea per la surveglianza da las bancas (Basilea III) per tut las bancas en il dretg svizzer. Ulteriuras disposiziuns davart la realisaziun, cunzunt en il sectur da las pretensiuns organisatoricas, fan part da la revisiun da l'Ordinaziun da bancas ch'è medemamain entrada en vigur il 1. da schaner 2013. L'Ordinaziun da liquiditat (OLiq) ch'è en vigur dapi il 1. da schaner 2013 pretenda che las bancas reglian e survegian en moda adequata las ristgas da liquiditat. En in segund pass vegnan ussa er surpigliadas las pretensiuns quantitativas envers la liquiditat tenor ils standards da liquiditat internaziunals. Las midadas da la OLiQ èn entradas en vigur il 1. da schaner 2015.

Facilitaziuns fiscales

Per promover l'emissiun da nov chapital da reserva e da conversiun en Svizra è vegnida abolida per il 1. da mars 2012 la taxa d'emissiun sin chapital ester. Medemamain è l'agen chapital che resulta da la conversiun dals CoCos vegni deliberà da la taglia d'emissiun sin l'agen chapital. Ultra da quai ha l'Assamblea federala decidi in la sessiun da stad 2012 ch'ils tschains dals CoCos e dals emprests cun renunzia al credit na duain en l'avegnir betg vegnir suttamess a la taglia anticipada.

Ulteriur basegn d'agir

En il rapport d'evaluaziun ch'il Cussegli federal ha publitgà il favrer 2015 vegn el a la conclusiun che la metoda TBTF da la Svizra è efficazia e po vegnir giuditgada en moda positiva en la cumparegliazion internaziunala. Ina nova orientaziun da la regulaziun n'è betg necessaria. Ma la finamira n'è betg anc cuntanschida. I dovrà mesiras supplementaras, cunquai che las bancas grondas èn anc adina ina ristga per ils pajataglias. Actualmain

na fissi anc betg pussaivel da liquidar ina banca gronda svizra en moda ordinada.

Il rapport recumonda cunzunt d'augmentar las pretensiuns envers ils agens medis da las bancas relevantas per il sistem. En la cumparegliazion internaziunala han las bancas grondas svizras numnadaman ina quota relativamain bassa d'agens medis graduads tenor las ristgas en proporziun cun lur summa totala da bilantscha. Igl è er sa mussà ch'i na porta nagut da separar posteriuramain las funcziuns relevantas per il sistem. Durant ina crisa acuta na sa laschan quests secturs betg distatgar entaifer in curt temp senza problems o d'ina organisaziun. Las unitads correspondentes dal concern ston vegnir separadas gia avant.

Stadi dal svilup

Il favrer 2015 ha il Cussegli federal incumbensà il Departament federal da finanzas (DFF) da preschentiar fin la fin da l'onn 2015 propostas per las adattaziuns giuridicas necessarias. Per quest intent è vegnida furmada ina gruppa da lavur sut la direcziun dal DFF cun represchentants da l'Autoritat federala per la surveglianza dals martgads da finanzas e da la Banca naziunala svizra. En las lavurs vegnan er integrads ils instituts da finanzas pertutgads.